

辽宁教育出版社



罗继祖 撰

萧文立 编校

雪堂类稿

附：永丰乡人
行年录

新世纪
万有文库



辽宁教育出版社

罗继祖 撰

萧文立 编校

雪堂类稿

附：永丰乡人
行年录



新世纪
万有文库



25



校定本出版弁言

义宁陈寅恪先生以预否世界主流衡学术之重轻，海宁王观堂先生国维以新材料之发现为新学问之始基，则近世中国学术，要推上虞罗雪堂先生振玉为大师，且开百代之学风，启后昆之法門，泽被至今。夫近世中国学术所以大异于往昔者，曰甲骨卜辞之学，曰敦煌石室之学，曰流沙坠简之学，曰大库史料之学，皆因新发现而成显学，治其学者不囿于中土，赳赳焉为国际汉学界主流。雪堂先生躬逢其盛，睹前人未窥之遗珍，乃废寝食、耗家财、殫精力，以传古为使命，一一搜罗、抢救、谱录、刊行、流传之，治斯四学者，莫不拜其厚赐。其愿力之弘、魄力之大、毅力之坚与夫效力之深且钜，上辉日月下盟山河而无愧，国史罕有其匹。传古之餘，益以释古，闭门键户四旬，苦思冥索，凿破鸿蒙，成《殷虚书契考释》，甲骨之学因之以立；与观堂戮力合释《流沙坠简》，鲁迅翁誉为治国故者之典范；均足垂百代之遗规。治四学者，得其一即足名世；著图录者，毕其一即垂千古；矧萃四学于一身，集传释乎一人！雪堂先生有功中华学术，又何待言哉？又何待言哉！抑有进者，如寰宇碑刻，如文字训诂，如经史校勘，如钟鼎彝器，乾嘉诸老之精擅者，雪堂先生亦莫不增长继高，深造有得。遗书具在，不可磨灭。然古圣三不朽，立言最末，立功次之，立德为先。雪堂先生之抱负，又岂章句学问之小儒可得尽耶？观其起身寒素，弱冠持家，精勤于盥，博综繁钜，长而游四方，兴农学，办教育，开通民智，谋

利民生，可知“致君尧舜上，再使风俗淳”为其平生职志。无何遭逢国变，遂窜身海隅作殷顽，且席不暇暖，汲汲以复辟仔肩，其矢忠一姓，与蒙古升素庵先生允相颉颃，差为爱新一朝饰羞。而以愚忠误坠倭贼网罟，贻讥后世，后人固应默察心恤，哀之怜之，轻薄为文哂之已失厚道，至若挟私怨、示清高、肆其毒詈者，不足存论矣。晚岁辞废帝而归隐海山，万念都灰，回首前尘，百不一偿，每夜拥衾，灯下娓娓与长孙鰲安先生继祖话当年旧事，命笔记之为《集蓼编》，书成并示四绝句，有云：“膝前喜有读书孙，清白家风望汝存。一语书绅牢记取，莫忘祖德与君恩”。五十年来，世变孔亟，天地翻覆，鰲安先生颠沛造次不敢忘，治亲历亲闻、先人自叙于一炉，具稿再四，终溃于成，雪堂先生一生心迹行事，征诸此书，历历可按，非徒可考镜御学术而已。且鰲安先生以史学自立，稟良史直笔之成规，据先圣褒贬之遗训，不为祖讳，更不追随时风以厚诬先人。故国史专家叠有称颂，张訢庵先生舜徽曰“叙事审密，无溢美无浮词，宣传祖德，可信可传”，谢刚主先生国桢曰“用事遣辞，非不学古文者可以望及”，陈保之先生邦怀曰“纪述核而不饰，文辞婉而情深，必传之作也”。稿具，吾师鰲安先生复尽数月之心力，恭楷敬缮一过，以传示子孙。藏诸篋中，忽忽已逾廿载，岁庚辰季夏发篋得之，以示文立。文立欢喜赞叹，谥为眼福，既商诸大连图书馆馆长张君子和为宣纸景印如千册，以为鰲翁寿开九秩之贺礼矣，又值《雪堂类稿》出版，为知人论世计，复取鰲翁最后校定之稿附焉。岁在辛巳雨水节，后学蓬莱萧文立谨识于连湾寓次之双守窠。

【目录】

卷上 / 1

卷中 / 45

卷下 / 103

附录一永丰乡人逸事 / 122

附录二家人身歿年月名单 / 130

台湾版跋 / 132

京都本跋 / 134

香港景印手稿本跋 / 135

谢国桢原序 / 136

永丰乡人行年录校定本

卷 上

清同治五年丙寅(一八六六) 一岁

六月廿八日子时,乡人生于江苏省淮安府山阳县南门更楼东寓庐。

乡人家自南宋时由慈溪迁上虞之永丰乡,遂为上虞人。传十九世,至乡人曾祖讳敦贤,字希斋,嘉道间历佐盐河幕,流寓江淮。希斋公九子,三讳鹤翔字翼云,江苏候补布政司理问,以廉能为大吏器异。道光廿二年,英人犯长江,以防海劳保知府銜。廿三年,以催漕获盗功保知州。历知泰兴、赣榆、高淳、江宁诸县事,终高邮州知州,是为乡人祖。翼云公二子,长讳树勋,字尧钦,江苏候补县丞,历署江宁县丞、海州州判、徐府经历、清河县丞,是为乡人父。配范淑人,山阳范咏春以煦长女,生子五,乡人次居三。尧钦公始定居淮安。按乡人先世无达者。据《上虞罗氏支分谱》,其上虞本支通朝籍者,惟八世名禄,恩贡生,历桃源、新繁、天长三县知县;十一世名康,嘉靖己酉举人,直隶武清县知县,敕授文林郎。至希斋公,以佐幕积俸,从事懋迁,而未尝以书商为业。溥仪《我的前半生》谓乡人出生旧式书商家庭,乃向壁之谈,殆以乡人好著书刊书,遂附会为此说,以荧视听歟?

乡人生，桐乡劳玉初乃宣与尧钦公有昆弟之盟，适游淮安，预于汤饼之会。时已有长姊宝□、长兄振璠、次兄振镛。

清同治六年丁卯(一八六七) 二岁

叔父仲宣公膺乡荐。仲宣公讳树棠，官终遂昌教谕。

清同治七年戊辰(一八六八) 三岁

乡人生而羸弱，冬始免乳。

清同治八年己巳(一八六九) 四岁

三月，长妹宝书生。后适山阳范氏，婿湘谷云，范太淑人犹子也。

乡人从长姊问字，至冬识字千馀。

尧钦公以纳粟捐得江苏县丞。

清同治九年庚午(一八七〇) 五岁

入塾，受《毛诗》。塾师李岷江导源，山阳拔贡生，尧钦公受业师也。

清同治十年辛未(一八七一) 六岁

受四子书。四月，次妹宝珊生。后适仪征汪氏。

清同治十一年壬申(一八七二) 七岁

病项间腺肿,读书即发,虽受《尚书》,师第令默坐暗诵,成熟后背诵之,以完日课。师为诸兄讲授,旁听,遂渐解文义。师讲“先祖匪人,胡宁忍予”句毕,谓古人质朴,若今直斥先祖非人,则不可矣。乡人起质疑,师曰:汝谓当作何解?曰:此恐与“母也天只,不谅人只”句意通,言先祖亦人耳,人莫慈于祖父,胡忍见子孙苦厄而不之恤乎?师大惊异曰:诗意诚如是,不意予尚昧而汝已明。特召尧钦公告之曰:此子异日必以学术名当世。一日师讲“具曰予圣,谁知乌之雌雄”句,谓人皆自谓圣,然孰圣孰否,亦如乌之雌雄莫辨。乡人质之曰:胡独以乌为喻?师曰:汝意云何?曰:鸟兽雌雄,往往于其毛色知之,如鸡凫,惟乌则雌雄毛色不异,无从遽别,犹人之圣否,无从一见而判也。师抚乡人首曰:此足以启予。师虑其慧而不寿,谓尧钦公曰:此子若得永年,异日成就必远大。祖母方太淑人亦器异之逾他孙。

十月,三妹宝泉生。后适宛平王氏。

清同治十二年癸酉(一八七三) 八岁

虽授《易》,仍以病,终日坐书塾默诵。

方太淑人治家严,子弟无故不许出塾门。端午节,李师偶携乡人入市,乍见工人锻铁,怪问:赤者何物?师告之。仲宣公遂以“铁打铁”三字命对,乡人应声曰“柯伐柯”。仲宣公疑非已出,更命对,应曰“人治人”。

是年,尧钦公赴涟水县折狱。

清同治十三年甲戌(一八七四) 九岁

医治腺肿,多投凉剂,遂病喉,月必数发。师命理已授书,不复授他经,且告尧钦公曰:“此子不虑学不成,虑体弱。授书非所急。”

清光绪元年乙亥(一八七五) 十岁

六月,弟子经振常生。

清光绪三年丁丑(一八七七) 十二岁

十月,四妹宝全生。后适山阳李氏。
始读唐诗,尧钦公更畀以工部、剑南两集。

清光绪四年戊寅(一八七八) 十三岁

毕读《易》《诗》《书》三经,初学为诗文及小论。

清光绪六年庚辰(一八八〇) 十五岁

读《礼记》《春秋》。

五妹生。

初学制印,苦无师承,以百钱从持竿售旧物者得汉人私印一,佩衣带间,为有印癖之始。

清光绪七年辛巳(一八八一) 十六岁

始学为制艺。三月,尧钦公送乡人长次两兄返里应童子试,命偕往,时八比甫成半篇。至杭,寓板儿巷邵家店。乡人途次病喉甚剧,水浆不能下咽者十九日,几误试期,会值孝贞皇后丧,展试期至五月,遂得留杭医疗,病愈就试。正场首题《皆为庶人,庶人不传质为臣》,次题《何谓尚志》,诗题《松花满碗试新茶得新字五言八韵》,经古场题《卢橘夏熟赋》,诗题《风摇杂树管弦声得声字五言八韵》。榜发,乡人入县学第七名,伯兄佩南振望第廿四名。学使太和张霁亭溪卿得乡人经古卷,欲置第一,寻疑童试不应有此,拆弥封,见年十六,益疑之,正场提堂面试,并出赋卷令讲解,无误,疑始释。因勉之曰:“予历试诸郡,未见才秀如子者。然子年尚幼,归家多读书,以期远到,不必亟科名。”在杭,偕仁和王同伯同谒郡庠,观宋高宗书石经,于堂壁见阮文达元所摹天一阁本石鼓文,手墨一本。游西湖,摩挲诸山题刻,流连不忍去,求墨本于坊肆,不可得。为平生癖金石铭刻之始。又于旅舍见桐城吴康甫廷康,年八十馀,长髯修干,藏专最富。索所著书,尚无印本,惟以古琴拓本四纸贻乡人。在郡城醉经堂书肆,遇乌程汪谢城曰桢。谢城,浙西耆宿,博学洽闻,能诗,精畴人术,时方为会稽教谕。李慈铭、杨岷皆重之。谢城丰体頽颜,不鄙乡人年幼,呼与谈学,一语契合,奖借备至,且手所辑《荔墙丛刻》为赠。是冬谢城卒官,年正七十。按乡人于前辈学人中最推服谢城。光绪末,中朝议奖宿学,乡人首举谢城,谓虽已故,亦应奖。后惟奖生存者王闿运、曹元弼三数人,汪不预。又乡人及见前辈学人中,尚有宝应成美卿璠,不知在何年,附识于此。北归,萧山单棣华恩溥,尧钦公挚友也,附舟至姑苏,日与尧钦公谈艺。尧钦公忽问乡人,汝读杜陆两集,所最服膺之句为何?乡人举杜“致君

尧舜上，再使风俗淳”，陆“外物不移方是学”对。棣华遽执乡人手，贺尧钦公曰：此子异日，未可以儒生限之。寂寞人寰，何意得此小友！乡人因以所集陆句“外物不移方是学，百家屏尽独穷经”乞作楹帖，棣华欣然命笔。乡人好读剑南诗，自号陆庵，应在是年前后。既返淮，尧钦公得藩司檄，委署江宁县丞。遂往就职，兼为避债计，命乡人佐范太淑人主家政。乡人平日足不逾书塾，罕接外人，至是受事，惶骇汗出，见司田租者如接大宾，几不知措词。久乃相习。

十月，弟振奎生。

季冬，乡人长次两兄完婚，拮据将事。除夕祀先，萧然无办，范太淑人命乡人奔走称贷，得钱四千，始得卒岁。

清光绪八年壬午(一八八二) 十七岁

秋，与长兄佩南同应乡试，报罢。纾道江宁县尧钦公。于书肆见粤刻《皇清经解》，尧钦公以钱三十千购以畀之，如获异宝。后遂以一岁，读之三周。归途经扬州，于书肆得仪征张氏榕园藏石拓本十馀纸，皆出广陵者，为储藏墓志拓本之始。

本年，始治经史考订之学，以余力及金石文字。家无藏碑，从山东碑贾刘金科赁碑读之，一碑钱二十。校勘《金石萃编》，凡讹文误字，悉为举正，碑字漫漶可辨而《萃编》失录者，亦为补书。五阅月，凡校七百馀碑。

清光绪九年癸未(一八八三) 十八岁

八月，弟振奎殇。

冬，始识塾屋路山夫岬。山夫翰苑世家，祖闰生德又以制艺名于时。山夫以荫子得官，历宰繁剧，勤于吏事，顾以倖直被劾

去。流寓淮安，筑屋于郡城东北隅，以在边高士寿民苇间书屋之西，遂颜曰“苇西草堂”。至是，与乡人纵谈金石考订之学，相得甚。山夫年长以倍，折节订忘年交。

乡人自去年始，率日厘家事，抵暮读书，鸡鸣就寝。夏间遂得不寐疾，羸瘠日甚。

弟子经年七岁，时无力延师，议至十岁遣学贾。乡人以其资稟可惜，罢学贾议而亲授之。

本年，淮安钦工镇耕者发古墓，中出器物。乡人辗转购得古镜一，遂为平生搜集文物之始。

本年，尧钦公从事金陵水利局工程。

清光绪十年甲申(一八八四) 十九岁

春，不寐疾渐愈。

四月，娶于范，连平范振之玉麟长女，长乡人一岁。范原籍粤东，流寓淮安。

方太淑人自仲宣公遂安任所返淮，尧钦公往迎，暂住白下。

本年，记校碑所得为《读碑小笺》，又取小小考订为《存拙斋札疏》，范淑人脱簪珥刻之，为乡人著书之始。后德清俞曲园樾采《札疏》语入所著《茶香室丛钞》中。俞当世经师，海内遂亦疑乡人为老宿，而不知时未冠也。

清光绪十一年乙酉(一八八五) 二十岁

十月十二日，长子福成生。

是冬，以上元水灾，尧钦公奉差办四乡振恤，驻湖熟镇之昭文书院，即阮氏文选楼旧址。

乡人长兄佩南常言士处贫贱，当自奋发，故颇肆力制举之

学。二十外始留意训诂名物,以为读书必先识字,识字以辨别正字、别字为要,辨别正字、别字以熟读《说文》及多见唐以前碑版为要,遂与乡人共赁碑读之。分居东西屋,每入夜,灯火荧然,伸纸疾读,煤染于手,十指尽黑,摩挲倦眼,则面目亦黧然。两人相顾绝倒,以为此乐非他人所能喻,而平日之愁虑抑郁,不觉其若失也。久之成《碑别字》五卷,乡人为序之。乡人亦成《金石萃编校记》《寰宇访碑录校议》各一卷。按《校议》后改名《刊缪》,附刊于《行素草堂金石丛书》本孙书之后。

本年,长兄佩南应乡试,复报罢。

淮入秋苦雨,禾稼不登,斗米千馀钱。路山夫出所藏旧拓《八关斋会报德记》易米,乡人素习颜书,于颜碑多得善本,尚阙此,亟以白粳五石易之。自记:“夜起展观,鸡鸣与风雨声都不复闻,而老友亦得三月饱食,忻快何如?”

清光绪十二年丙戌(一八八六) 二十一岁

八月,长兄佩南病歿,年廿四。时贫甚,无以为殓,范淑人出金饰易六万钱,乃得襄事。无子,以乡人长子福成嗣之,范太淑人命也。

本年,尧钦公摄淮安府樵务篆。

本年,撰《毛诗草木鸟兽虫鱼疏新校正》二卷。

清光绪十三年丁亥(一八八七) 二十二岁

四月,汪梅村士铎为作《存拙斋札疏跋》,曰:罗君坚白以所著《存拙斋札疏》属予讎正,且丐为之序。予拭老眼读之,其书不盈一卷,而考证极多精核。如证《论语》“温故而知新”,温即蕴字;《礼记·中庸》“素隐行怪”,《汉书》引作索隐,乃素索古字通

用；《老子》“夫佳兵者不祥之器”，夫佳之佳乃惟字，非从人从圭之佳；均确然不刊，古人复生，亦无以易其说。此外若四乳、木冰、石文成字、廿四月产子诸条，并资多闻。君食贫笃行，敏于著述，年裁弱冠，斐然有成，后来之彦，非君莫属。予暮齿养徐，目眊意倦，炳烛之明，仰惭前哲。责以作序，实难俞命，然厚意不可辞，爰揽素为跋，并审正其讹字而归稿于君。按梅村作此跋时，目眊已不能书，口授他人书之。

自乡人长兄逝后，家计益穷，一门之内，惨戚无欢。方太淑人深以株守为非计，戒乡人宜弃产之半以还急债，俾尔得负米四方，乃可复兴门祚。乡人谨受教，维时米价贱，一石才二千钱，田不易售。乡人乃质衣物得千钱，至江宁谋之尧钦公。尧钦公曰：“今谋食者多于牛毛，有仍岁处渴舍而不得者。尔贸然来，冀以旦暮遇之耶！”闻而嗒然若丧，留三日归。时乡人薄有文誉，常为人捉刀作书院课卷，为校阅者崇实书院山长南丰刘慈民庠所知，刘老且病，遂请乡人代阅，割俸为酬。乡人勉应之，为阅卷年馀而却其酬。

夏，尧钦公受理江宁清节堂事务。秋末，署海州州判。

本年，乡人撰《俗说》、辑皇甫谧《高士传》各一卷。

清光绪十四年戊子(一八八八) 二十三岁

乡人自习训诂之学，不复骛制举。尧钦公信日者言，谓当得科第，官京朝，令从山阳杜宾谷秉寅受学。家事旁午，两月才作三艺。其《肫肫其仁》一艺，宾谷甚赞许，惟谓不合制艺作法。乡人始悟中式之难，盖科名得丧，全操之于人也。

是秋，勉应试，仍报罢。在杭见桐城吴氏藏砖百馀列肆求售，皆《慕陶轩碑录》中物也。归而病锁口牙痛，十九日不能进点水，疮自颈溃，出脓碗许乃愈。至是遂绝迹棘闱。

夏,长姊适山阳何氏卒。

本年始与山阳邱于蕃崧生订交,于蕃号嵩庵。邱氏自清初以来,代有闻人,以政事文学名当世者,先后相望。于蕃时年方壮,先世有遗产足自贍,蒔花种竹于所居,日与朋俦研讨词章金石书画为娱乐,或招携为文酒之会。乡人得阮吾山葵生《风雅蒙求》稿,以示路山夫与于蕃。路、邱各作序跋,醵金刻行之。

清光绪十五年己丑(一八八九) 二十四岁

正月,长女孝则生。

夏,以所藏明仿宋庆元晁氏宝文堂本《具茨集》赠邱于蕃,《四库》未著录。

七月,汪梅村卒,年八十有八。

仲秋,校《陈书》。

清光绪十六年庚寅(一八九〇) 二十五岁

正月,馆山阳刘氏,岁脩二万钱,邱于蕃所荐也。本拟荐清河吴氏,修丰于刘。以吴在大兴,馆地太远,遂辞丰而就嵩(据上尧钦公稟手迹,下凡稟尧钦公皆同)。

闰二月十一日,祖母方太淑人卒,年七十。

孟夏,订《陆庵仿秦汉篆刻润例》:“石章每字半元,象牙竹根黄杨倍价,极大极小倍价,边跋每五十字洋一元,劣石及文字不通不刻。”

夏,订正李氏《纪元编》,取诸史及他纪元专书,详加讎校,订正百数十处。别为《考异》一卷,至冬乃毕。按此最初稿。嗣后递有增订,至民国十四年乙丑(一九二五)始刊行。

九月,次子福同生,八日而殇。

本年，又撰《毛郑诗校议》一卷。

山阳丁柏丞松为作《陆庵校书图》，路山夫及山阳顾持白云臣、徐宾华嘉、成絜生饴皆有题咏（图已佚）。

文有日本人著《和汉洋年契》《史略》跋。

清光绪十七年辛卯（一八九一） 二十六岁

秋，至海州省尧钦公。时州议续修志，刘慈民荐乡人任之。至则州牧邀饮，并集州绅商志例。会某某已有成议，惧外人染指，议故弗谐。尧钦公为言其故，遂托辞谢之。

仲秋，删厘累年文字为《面城精舍杂文甲编》一卷。又撰《眼学偶得》《干禄字书笺证》各一卷，梁陈北齐后周隋《五史校议》五卷。丐友作《赁碑图》，志与长兄佩南赁碑共读事，时长兄歿五年矣，作《图记》，谓“记我鹄原之痛，且以志寒士为学之匪易也”（按图似未果作）。

本年，山东河患频仍，抚幕妄人主贾让不与河争地之策，放宽河身，至欲移海内振助之款助官购民地。乡人居闻之而骇，谓今日河身已宽，再宽则漫溢之害无穷，乃著论千馀言驳之。丹徒刘渭清梦熊见而赅之，以寄其弟铁云鹗，时铁云方任鲁河下游提调，主王景攻沙去淤，与乡人说十合八九。铁云亦以所上《治河七说》寄乡人，附书言：群盲方竞，不意尚有明目如公者。尊论渊雅，吾文则如老嫗与小儿语，中用王景名，幕僚尚不知为何代人。于是罢购地议。东抚张勤果曜故籍上虞，闻而欲延乡人人幕，乡人以不能离家远游谢焉。

有李氏者，藏五代杨吴李涛妻志石，扬州濬漕渠所得，文字漫灭，而题署年月具存。乃移石至邱于蕃家，乡人与吴县蒋伯斧亲施毡墨。

是年六月，尧钦公赴州西房山镇勘命案，八月赴州东响水口

勘盗案。

文有《魏源磨耶墓志》《北齐刘懿墓志》跋。存诗有《延陵十字碑》五律《六月廿一日，与邱君亩庵同拜欧阳文忠生日于路山夫丈欣舫，联句纪事》五排《题海州园林寺》五律凡三首。

清光绪十八年壬辰（一八九二年） 二十七岁

正月，次女孝诚生。

三月，范淑人以蓐劳卒。淑人来归，值家中落，斥装佐饔餐，井臼洗濯刀匕乳哺，一身任之，无怨色。乡人夜读，淑人必为整书卷，理衾枕，已则侧坐缝纫。匝月不通一语，恐妨读也。淑人母颜苦节，弥留以母为托。淑人卒后，长男鞠于范太淑人，长次两女寄养外家。

冬，嫂清河王氏亦病瘵亡，冬末，与范淑人同殡于南郭外之五里松成子庄。

本年，乡人始治谱系目录之学。成《新唐书世系表考证》一卷、《艺文志校议》二卷（按两书未刊行。宣统初，乡人官学部，灌阳唐尚书景崇假去，尚书故，书未还辄）。又撰《三国志证闻》三卷。清河王寿萱锡祺为刊《淮阴金石仅存录》一卷于《小方壶斋丛书》中，辛卯夏所辑也。寿萱跋曰：“罗君叔韞，上虞人也，旅居淮阴，嗜金石成癖，藏碑版千百通。念淮阴金石之散佚荡缺，口涎手胝，摹拓考证，正往史之失，补志乘之遗。必云抗衡阮仪征、翁大兴、王青浦、孙阳湖，所不敢知，然于金石可继张力臣、吴山夫”。吴兴施均甫补华从张勤果西征，得汉刘平国《治关城颂》《沙南侯获刻石》墨本，以寄乡人，属为考证。时篋中惟有裴岑《纪功铭》，至是备有西域三汉刻。

本年，文有《长兄佩南先生传略》、《小学钩沈续编序》、《黄庭经》《邱珍碑》《化度寺邕禅师塔铭》诸跋。存诗有《人日与成丈味